









(ase F 39 .326 1564 f

LETTRES DE

COMMISSION DV ROY,

s VR L'EXECVTION DE l'Edict de la pacification des troubles de ce Royaume.

Auec

La Declaration faite par le Roy, pour apres le depart de sa Maiesté des villes où l'exercice de la Religion reformee estoit, le reprendre & continuer.

M. D. LXIIII.

THE NEWBERRY LIBRARY



HARLES par la grace de Dieu Roy de France: A nos amez & feaux,

salut & dilection.

Apres les grades calamitez, ruines, desolations & domages, que cestui nostre Royaume a souffert pour l'iniure de la guerre passee, & les lamentables afflictions que tous nos poures suiets en ont ressenties : Il a pleu à Dieu nous consoler d'vne paix & pacification, laquelle nous auons mis peine de faire publier & establir par tous les lieux & prouinces de nostredict Royaume & pays, & de le faire tellement observer, que tous nos peuples en demourassent en repos & tranquillité. Mais ayans veu que les choses sont demources imparfaites en beaucoup d'endroits, tant pour la dureté & passion de diuerles personnes, q pour la desfiance qu'aucuns de nos peuples se sont imprimees les vns des autres, qui les garde & empesche de s'y accommoder. Et ayans d'autre part esté aduertis qu'il y en a beaucoup, qui abusans de la licence qu'ils se sont donnée durant lesdicts troubles, font beaucoup de pilleries & saccagemes, à l'entiere ruine de nosdicts suiets: Nous auons aduisé d'enuoyer esdicts 48-1127

lieux & prouinces aucuns de nos amez & feaux Coseillers de nos Cours souveraines, pour en allant de lieu à aurre, pour uoir à l'esstablissement de ladicte Paix, & à la punition des delinquans, selon le departement que nous en auons sait presentement, par l'aduis de la Royne nostre treshonorce Dame & mere, Princes de nostre sang, & gens de nostre Conseil priué. Et ayant esté ordonné pour vostre part dudict departement la prouince

Nous vous auons commis, ordonnez & deputez, commettos, ordonnons & deputons par ces presentes, pour vous transporter incontinent & le plus diligemmet qu'il vous sera possible, en toutes & chacunes les villes, lieux & endroits de ladicte prouince que besoin sera. Où nous vous donnos pouuoir, puissance, authorité, commission & mandement special, & à vn chacun de vous en l'absence, maladie & legitime empeschement de l'autre, de conuoquer & assembler les Officiers, Capitaines, Mayeurs, Efcheuins, & tel autre nombre des principaux habitans que verrez bon estre: pour par leur moyen & autres que vous estimerez estre necessaires, pour entédre la verité de la chose, vous enquerir & informer du deuoir qu'ils auront fait en l'execution du traité de HH ii.

ladice Paix & pacification, & s'il en reste aucune chose à faire, le faire executer de poinct en poinct reaument & de faict, selon sa forme & teneur, & le faire inuiolablemer observer & entretenir, & du benefice d'iceluy iouir tous ceux qu'il appartiendra & besoin sera, sans aucune contradiction ne difficulté. Pour lequel effect vous ferez ouurir les prisons à tous prisonniers codamnez ou non condamnez, qui seront detenus pour les cas remis & abolis par ledict traité. Et s'il se trouve quelque opposant, nostre Procureur ou pattie interessee, verrez sommairement les proces. Et s'il vous appert qu'il ne soit question que du faict de la Religion, port d'armes, ou autres cas commis durant ces guerres dernieres, abolis par ledict traité de Paix : passerez outre à l'execution que dessus, nonobstant reculations, oppositions ou appellations quelconques, desquelles nous auons retenu & retenons à nous & à nostre Coseil priué la cognoissance. Et si par la visitatió sommaire desdicts proces, il vous appert qu'outre les faicts susdicts abolis par ledict traité, il y ait charge d'autre crime, ferez pour le regard d'icelles autres charges, instruire & iuger le proces par les gens tenans les Cours de Parlement ou sieges Presidiaux, & assisterez au rapport & iugement qui s'en fera, si bon vous semble. Et par ce que plusieurs pourrot tomber en difficulté, sur l'interpretation & execution du contenu en vne clause portee par ledict Edict, contenant exemptions des meurtres & volleries, sous couleur de laquelle lon voudroit excepter de la grace & abolition fusdicte, tous meurtres, volleries & saccagemens, encores qu'ils eussent esté commis au faict de la guerre: qui seroit directement contreuenir à nostre intention, & des Seigneurs qui assisterent à faire ledict traité, & qui pour le bien de ladicte Paix trouverent bon & necessaire abolir les crimes métionnez andict Edict, & la memoire d'iceux: Nous auons declaré & declarons, qu'en la grace & abolition portee par ledict Edict, ne soyent comprises les personnes qui ont commis meurtres & volleries hors camp & assemblees de guerre, par gens non auouez d'une part ne d'autre, & qui auront fait & commis lesdicts cas, exerçans leurs haines & vengeances priuces, ou meus d'auarice: ce qui se peut declarer par exemple. Comme si quelcun n'allant ne portant armes en vn parti n'en l'autre, eust tué & saccagé vn autre, de quelque religion que ce fust, pour quelque haine contre luy conceuë, ou pour auoir son bien. Nous n'entédons aussi estre HH.iii.

comprins en ladicte grace & abolition generalement ceux qui autôt commis crimes & delicts punissables, par ceux mesmes qui commandoyent à leur parti: Comme si(par exemple) quelcun auoit forcé vne femme, tué vn petit enfant, ou vn de leurs compagnons de leur part: car tel crime eust esté ou deu estre puni par ceux mesmes sous charge desquels estoyent lesdicts coulpables. Vous ferez aussi remettre & restablir chacun en fa maison qui luy auroit appartenu en proprieté ou louage, dont il auroit esté expussé pour le faict de la Religion, ou autre cas contenu audict traité:ou bien les veuues ou heritiers des expulsez, qui seroyent depuis decedez: & où lesdictes maisons auroyent esté baillees à autre à louage par authorité de Iustice, seront remis dedans. Seront aussi restablis les dessusdicts en leurs autres immeubles & rentes constituees, que nous tenons & reputons pour immeubles, le tout, soit qu'il y ait iugemet ou non. Et ores qu'il y ait eu confiscation ou autre adiudication d'iceux à nous faite, ou que les dicts immeubles se trouuassent vendus à tierces personnes pour payement des mulctes, amédes, ou reparations à nous adiugees, & aux Eglises, communautez, ou parties ciuiles. Ouquel cas toutesfois les tiers acquereurs de bonne

foy feront remboursez par nos receueurs, si les deniers sont prouenus en leurs mains, ou par ceux qui les auront receus: & à ceux qu'ils auront esté adjugez par Iustice: ne sera toutesfois sous couleur ou pretexte dudict remboursemet no fait, differé ledict restablissemét. Le semblable sera gardé & obserué pour les fruicts desdicts immeubles & autres meubles desdicts expulsez, lesquels leur seront rendus s'ils sont en nature, ou les deniers procedez de la vente d'iceux, s'ils estoyent consommez par ceux qui ont receu lesdicts deniers, soit nos receueurs ou ceux à qui ils auroyent esté adiugez par lustice. N'entédans toutes fois en ce comprendre les meubles & fruicts d'immeubles, qui auroyent esté prins durat la guerre, és courses & entreprinses, prinses & assaux de villes, chasteaux & autres lieux, passages d'armes & autres actes de guerre, faits en forme d'hostilité: desquels, ne de la valeur d'iceux. ne sera faite aucune restitution ou restablissement. Et quant aux biens meubles ou immeubles prins ou vendus depuis ledict traité de Paix, vous ferez rendre iceux biens, ensemble lesdicts fruicts, encores qu'il y eust iugement precedant, par ce que les acquereurs seroyent audict cas de mauuaise foy. Et outre seront par vous condamnez

les ordonateurs de telles ventes, & les vendeurs aussi en telles amendes que la qualité du cas le requiert. Ferez aussi rétrer chacun Officier en son estat & office, nonobstat les charges, procedures & iugemens cotre eux faits & donnez pour raison desdicts cas abolis comme dessus, sans les greuer ou charger d'aucune charge non accoustumee, ne les recercher du faict de leurs consciences. n'exiger d'eux autre declaration, profession, ou serment que celuy qu'ils ont fait à leur reception. Et pource que depuis ledict trairé ont esté faites plusieurs procedures, & donné plusieurs iugemens & arrests contraires à iceluy traité & à nostre intention: nous voulons & entendons que vous n'y ayez aucun efgard, non plus que s'ils auoyét esté donnez au parauant ledict traité: ains que vous suiviez l'ordre & teneur de ces presentes, nonobstant lesdicts iugemens & arrests. Et d'autant que vous pourriez en quelque cas particulier, tomber en doute & difficulté, si aucuns des cas occurrens sont exceptez ou non: nous entendons aussi que les cas s'offrans, vous en ferez renuoy à nous & à nostredict Conseil priué, pour le juger & decider. Voulons neantmoins que tout ce qui sera par vous ordonné, soit executé par prouision, nonobstant recusations, op-

positions, ou appellations quelconques: desquelles nous avos retenu & retenons à nous & à nostredict Confeil la cognoissance: & à ceste fin auons euoqué & euoquons à nous lesdicts faicts, differens & proces dependans dudict trané & execution d'iceluy, & iccux renuoyez pardeuat vous pour estre par vous iugez & à nous renuoyez, si voyez qu'il soit bon, ou les faire iuger par les iuges Presidiaux en vostre presence ou absence, le tout ainsi que mieux verrez estre à faire. Et d'autant que par ledict traicté est dit qu'en chacun Bailliage & Seneschaucee sera par nous nommee vne Ville, és fauxbourgs de laquelle ceux de la Religion qu'on dit reformee, pourront faire l'exercice de leur Religion: suivant lequel trascté nous avons fait ladicte nomination en la pluspart desdicts Bailliages & Seneschaucees en aucunes, non par ce que n'estions bien acertenez si les lieux, esquels lon demandoit ledict exercice, estoyent erigez en nom & titre de Bailliage & Seneschaucee ou non: ou qu'aurions differé ladicte nomination, pour ne sauoir la commodité ou incommodité des lieux, ou iusques à ce que fussions requis par ceux de ladicte Religion, à leur bailler & assigner lieu, ou pour quelque autre raiso que ce soit: Nous voulons que de ce communiquez &

conferez auec nos Gouverneurs & Lieutenans, & ensemblément auisez de pouruoir à l'establissemét des lieux par nous nommez. Et au cas qu'il n'y ait encores eu aucune nomination de nous, procedez à icelle nomination, en accommodant doucement & amiablement les vns & les autres, de soite & maniere qu'ils n'ayent occasion de cy apres à nous reprier. Vous enioignant aussi vous enquerit de la vie, mœurs & conversation de tous nos Officiers des lieux, & comme ils se sont portez au faict & executió dudict traicté, & informer & faire le proces à ceux de nosdicts Officiers qui auroyent commis ou commettroyent rebellion, desobeissance ou contrauention au côtenu dudict Edict, & de nostre vouloir, intention & commandement: Et de suspédre ceux que vous trouuerez coulpables, & en leur lieu commettre autres plus anciens Officiers ou praticiens, & renuoyer lesdicts coulpables auec leurs proces pardeuers nous & nostredict Coseil: Pour le tout veu & vous ouy, estre fait punition des mauuais, & recompense à nos bons & fideles seruiteurs. Et generalement ferez en ce qui appartient en nostre obeissance,& à l'obseruation de ces presentes, tout ce que verrez estre requis & necessaire pour le bien de nostre seruice, & repos general & vniuer-

sel de nostre royaume, selon qu'il est dir cy dessus: En mandant à tous Gouverneurs des prouinces, pays, terres & seigneuries de nostre obeissance, leurs Lieutenas, gens tenans nos Cours de Parlemet, Baillifs, Seneschaux, Preuosts, Iuges, Magistrats, Presidiaux, Preuosts des Mareschaux, & autres Iusticiers & officiers, que pour l'executio des choses susdictes ils vous aydent, secourent, prestent & donnent tout ayde, force, conseil, assistance & faueur dont vous les requerrez, sans y desobeir ni contreuenir en quelque sorte que ce soit. Vous auons donné de faire ce que dessus, comme encores nous vous donnons, plein pouuoir, puissance, authorité, commission & mandement special. Donné au bois de Vincennes, le dixhuictieme iour de Iuin, l'an de grace, Mil cinq cens soixante trois. Et de nostre regne le troisieme.

Ainsisigné, CHARLES.

Par le Roy en son Conseil,

ROBERTET.

Et seellé du grand seel dudict Seigneur à sample queuë de cire iaune.

II.ii.



DECLARATION FAITE
par le Roy, pour apres le depart de sa Maiesté des villes où l'exercice de la Religion
reformee estoit, le reprendre & continuer.



HARLES, par la grace de Dieu Roy de France, à tous ceux qui ces presentes lettres verront, Salut.

- Chacun sait, & beaucoup ont sentices annees passees,

cobien nostre Seigneur estoit irrité & courroucé contre nous, & nos poures suiets, par les visitations qu'il luy a pleu iustemet nous faire (comme il faut croire, à cause de nos pechez) par les armes qui ont esté exercees en cestuy nostre Royaume. Lesquelles, come il est benin & plein de bonté & clemence, il a bien voulu convertir en vne bonne paix & reconciliation vniuerselle de tous nosdicts suiets, telle que lon voit, de ce qui s'est ensuiui de l'Edict & declaratio, qui en for par nous faite dés le mois de Mars mil cinq cens soixante deux, auec le bon & prudent aduis de la Royne nostre treshonoree. Dame & Mere, Princes de nostre sang, & autres grands & notables personnages de

nostre Conseil priué: auquel toutes choses furent bien, & meurement cossiderees, pour rendre & laisser à vn chacun la satisfaction & le contentement necessaire: mesmement pour la liberté des consciences, & exercice de la Religion pretendue reformee en certains lieux. Afin que par ce moyen toutes occasions de riottes cessasser nous pourueoir du necessaire remede, à la maladie dont nostredit Royaume est trauaillé: & de laquelle sot nais & sortis tant de maux & de calamitez,

que tout le monde a veu.

Er pource qu'entre autres poincts lors mis en auant, nous arrestasmes, & fut ainsi accordé, quelque liberté qu'ayons ottroyé par ledit Edict de declaration de faire prescher, & exercice de ladite Religion en certaines villes, faux-bourgs, & villages de nostredit Royaume: Que neantmoins par tous les lieux où nous serios, ledit exercice cesseroit, pour le temps que nous y demourerions. Et de faict, peu apres, par certaine ordonnance par nous faite au bois de Vincennes, publié en nostre cour, fut en cest endroit nostredite intention assez cognuë, & entenduë. Et aussi s'est-il obserué, & gardé par tous les lieux & endroits de nostredit Royaume, où nous auons passé. En quoy nous auons trou-

II.iii.

ué nos suiets tresobeissans. Toutes sois afin que ce poinct-là ne puisse estre ci apres mis en aucun doute ne difficulté, pour n'auoir esté escrit audict Edict de pacification: n'aucun pretêdre, que par la declaratió par nous faite au mois de Decembre dernier, sur l'interpretation dudict Edict, nostredite intention soit en cela aucunement changee: ne que pourtant nous entendions aussi nostredit Edict de pacification estre en rien alteré, ne innoué:

Auons, par l'aduis de la Royne nostredite Dame & Mere, Princes de nostredict sang, & gens de nostredict Conseil, dit & declaré, disons & declaros, que nostre vouloir à tousiours esté, & encore est, que quelque liberté qu'ayons par iceluy Edict baillee & accordee d'exercer icelle Religion pretédue reformee, esdites villes, & lieux: Neantmoins nous entédons, voulons & noº plaist, qu'à nostre suitte il n'y en ait point. Et aussi qu'en toº les lieux & villes où nous passeros, tant que nous y seiournerons, ledit exercice cesse: sans ce qu'il s'y en puisse faire aucun en quelque sorte q ce soit, durant que nous y serons. Mais se cotiendront ceux qui en sont profession, modestement en leurs maisons, esquelles nous entendons qu'ils viuent en liberté auec leurs familles, sans estre recerchez en aucune maniere: pour apres nostre partemét desdits lieux, y estre ledit exercice continué, ainsi qu'au parauant, suiuant la teneur de nostredit Edict, & declaration.

Que nous voulons, & entendons estre au surplus inuiolablement & estroitemet gardez, & obseruez de poinct en poinct, selon leur forme & teneur. Et afin que ceux de ladite Religion pretédue reformee, ne soyent durant ledit exercice ainsi suspendu, pendat nostre demeure esdits lieux, destituez des commoditez qui leur sont necessaires des Baptesmes de leurs enfans, & mariages: Entendons qu'ils les puissent faire aux autres lieux pl' prochains, esquels il est permis. Ou bien leur sera, à cest essect, par nous pourueu d'autre lieu conuenable, pour ledit temps, ainsi que iugerons estre plus à propos.

Si donnons en mandement à nos amez & feaux les gens tenas nos Cours de Parlemens, Bullifs, Seneschaux, ou leurs Lieutenans, & à chacun d'eux, si comme à luy appartiendra, que nostre presente declaration ils facét lire, publier, & enregistrer en leurs iurisdictions: & le contenu entretenir, garder, & obseruer de poinct en poinct, selo sa forme & teneur. Car tel est nostre plaisir. En tesmoin de ce nous auos sait mettre no-

stre seel à cesdites presentes.

Donné à Lyon le 24. iour de Iuin, l'an de grace 1564. & de nostre Regne le quatrieme.

Ainsi signé sur le reply, Par le Roy en son Conseil,

DEL'AVBESPINE.

Et seellé de cire iaulne à double queuë.

Publice en la Cour de Parlement à Paris, le 13. iour du mois de Iuillet. 1564.

FIN.































